

Pisortat suliffeqarfiutaani aasaanerani piffissat suliffiusartut nalilersorneqarsinnaanissaat pillugu apeqquaqaat aallaavingalugu oqallisissiasatut siunnersuut.

(Inatsisartunut ilaasortaq Aqqalu C. Jerimiassen, Atassut)

Oqaaseqaat

Naleqqap aasaanerani nalunaaquttap atorunnaarsinneqarnissaa aammalu UTC -3-imut utertoqarnissaa pillugu inatsisissatut siunnersuut saqqummiunniuuua. Tamanna suliffeqarfiit namminersortut suliffimmi piffissarititaannik naalakkiiniarnerunngilaq. Tamanna nalunaaqutamut aalajangersaanermut tunngassuteqarpoq, tassa Kalaallit Nunaata pisortatigoortumik nalunaaquttap qanoq inatsisimassanera pillugu.

Naalakkersuisut, Atassut imaluunniit allat isumaqarpata aasaanerani piffissat suliffiusartut piviusumik ajornartorsiutaasut, taava apeqquq imaannaanngitsuunngilaq: Sooq taava Naleqqap nalunaaqutamut aalajangersaanermut tunngasumik siunnersuutaata suliarinissaa arlaleriarluni kinguartinneqartarsimava?

Siunnersuut ukiakkut 2024-mi ataatsimiinnermi siullertut inaarutaasumik suliarineqartussaasimagaluarpoq. Tamatuma kingorna 2025-mi upernaakkut ataatsimiinnerup kinguartinneqartup ilaanut aamma kinguartinneqarpoq. Taava ukiakkut 2025-mi ataatsimiinnermut kinguartinneqarpoq. Kingullermillu februaarimi 2026-mi USA-mut tunngasumik pissutsit innersuussutigalugit ataatsimiinnerup sivitsorneqartup taamaatiinnarneqartullu ilaanut kinguartinneqarpoq.

Tamannalu teknikkikkut annikitsuunngilaq. Siunnersuutit Inatsisartut ukiuata naanerani inaarutaasumik akuersissutigineqarsimanngitsut atorunnaartarput. Siunnersuut atorunnaarpat, Inatsisartuni nutaamik saqqummiunneqarpat aallaqqaataaniit aallartiteqqittariaqartarpoq.

Maanna ajornartorsiut uteqqippoq. Nalunaaquttap innuttaasunut ulluinnarni inuunerannut, sininnerannut, atuarnerannut, sulinerannut ilaqutariillu inuunerannut sunniuteqarpoq. Aalajangiisoqarnissaali pinnagu suliaq kinguarsarneqarsimavoq, naggataatigut atorunnaartinneqarnissaata tungaanut. Tamanna akisussaassuseqarluni inatsisiliornerunngilaq. Tamanna politikikkut suliaqarnermi nalornineq periutsillu patsisiginiarsaralugit toqqorterinninneruvoq.

Tamanna ingammik eqqumiinnerulerpoq maanna atuarneqarsinnaammat Atassutip, aasaanerani nalunaaquttap atorunnaarsinneqarnissaanut akerliulluni aammalu ukiumoortumik nalunaaquttap allangortinneqartarnerata peerneqarnissaanut akerliulluni, maanna pisortat suliffeqarfiutaanni aasaanerani piffissat suliffiusartut nalilersorneqarnissaa qaqimmassuk.

Allatut oqaatigalugu: Nalunaaquttap, maanna atuuttup ajornartorsiutaanera iluarsiniarneqarusunngilaq, kisianni nalunaaqutap nikisittarnerata ajornartorsiutinik pilersitseqataaffigisaanik kingunerisai kisiisa aaqqiiffigerusunneruaat.

Atassut Kalaallit Nunaata UTC -3-imut utertinneqarnissaanut akerliusimavoq, naak tamanna nunatta nunarsuarmi inissisimaneranut naleqqunnerugaluartoq. Taamaakkaluartorli maanna nammineq tikkuarpaa inuit aasaanerani ullaakkut qasusinnaasut aammalu unnukkut eqeersimanerusinnaasut. Tamannamiuna Naleqqamiit isornartorsiuinitta ilagilluinnaraat.

Assigiinngissut tassaavoq Naleqqamiit ajornartorsiutip sorlaa aaqqikkusupparput, allalli kingunipiluit kisiisa aaqqiiffigerusullugit.

Atassut isumaqarpat aasaanerani sulinermi piffissat suliffeqarfinni aalajangersimasuni ajornartorsiutaasoq, sooq taava suliffeqarfiit pineqartut namminneq sulinissamut piffissarititat allatut aaqqissinnaagaat siunnersuutiginnilaat?

Ajornartorsiut assersuutigalugu Air Greenlandimut, turnusinut aalajangersimasunut, timmisartuussinernut imaluunniit inuussutissarsiortut ilaannut aalajangersimasunut tunngappat, taava aaqqiissutissaq tassaasariaqarpoq suliffeqarfiit taakku namminneq pisariaqartitaminnut naleqqussarlutik aaqqissuussinissaat. Suliffeqarnermi pissutsit nalinginnaasumik taamatut ingerlasarput.

Kisianni paarlattuanik UTC -2-imut ataannarusullutik Kalaallit Nunaanni inuiaqatigiinnik tamarmiusut tigusatut inissippaat.

Allat tamarmik naleqqussartariaqarput. Meeqqat, ilaqutariit, atuarfiit, suliffeqarfiit innuttaasut kingunerluutaasut inooqataaffigiinnartariaqarlugit, inuit ilaasa nalunaaqutap nunatta nunarsuarmi inissisimaneranut pissusissamisoortumik naleqqutitngitsumik ingerlanissaanik kissaateqarnerat pissutigalugu.

Maluginiarnarnerpaavorli Atassutip nammineq siunnersuutaa ajornartorsiutip piuneranik uppersaasutut atorneqarsinnaammat. Siunnersuuteqartup nammineq oqaatigaa inuit aasaanerani ullaakkut qasusinnaasut unnukkullu eqeersimanerusinnaasut. Kisianni



siunnersuut tamanna ersarissumik oqarnissamut atorneqanngilaq: UTC -2-imut ikaarsaariarneq ajoqutaasimavoq eqqarsaatigilluarneqarsimananilu.

Tamatuma saniatigut aalajangiinerup kukkusup kingunerisaanik ersiutaannaat iluarsiniarneqarsarineqarput.

Naleraq suliffeqarfiit namminersortut suliffimmi piffissarititaannik naalackersuiniarniannigilaq. Inuussutissarsiortut namminersortut qanoq aaqqissuussinerannut akuliutinngilagut. Suliffeqarfik imaluunniit pisortat suliffiutaasa ilaat aasaanerani immikkut suliffiup nalaanik pisariaqartitsippat, pisariaqartitsinini naapertorlugu aaqqissuussisariaqarpoq.

Kisianni Kalaallit Nunaata pisortatigoortumik nalunaaqutaa peqataasut ataasiakkaat pisariaqartitaat tunngavigalugit aaqqissuunneqassanngilaq. Piffissamik aalajangersaaneq inuiaqatigiinnut tamanut tunngavoq. Taamaattumik aasaanerani nalunaaqutaaq atorunnaarsittariaqarparput aammalu UTC -3-imut utertariaqarluta.

Aap, Naleqqamiit siunnersuut taanna saqqummiuteqqissavarput. Aamma naak erseqqissumik tusarsinnaagaluaripput naalackersuisooqatigiit tamanna kissaatiginngikkaat. Ajornartorsiummi innuttaasut ulluinnarni inuunerannut, sininnerannut, atuarnerannut, suliffiannut ilaqutariinnullu inuunerannut sunniuteqartoq peerunnaviannigilaq, amerlanerussuteqartunit suliaq kinguartinneqarpat, atorunnaartinneqarpat imaluunniit allat tamarmik puigussagaat neriutigineqarpat.

Uagut Naleqqamiit puigornaviannigilarput.